

Biografia Mario Pacchioli

Mario Pacchioli, fegl d'ina mumma romontscha e d'in bab talian, ei naschius igl onn 1981 en Surselva. Ensemen cun sia sora crescha el si en ina famiglia passiunada per la musica. La "canzun romontscha" e la "canzone italiana" ein ina part integronta da sia affonza.

Cun sis onns pren Mario Pacchioli per l'emprema ga igl accordeon da siu tat enta maun. Quei eveniment impurtont munta per el igl emprem pass sin sia via musicala. Gia baul entscheiva el sia instrucziun classica da cant e clavazin. Suenter haver finiu siu studi al Seminari scolastic dil Grischun sededichescha el cumpleinamein alla musica. Igl onn 2004 separticipescha Mario Pacchioli all'emissiun da televisiun "MusicStar" e vegn enconuschents ell'entira Svizra. Cun 23 onns obtegn el sia emprema platta dad aur. Cuort suenter serenda el a Los Angeles, nua ch'el frequenta il "Musicians Institute of Technology" a Hollywood per seperfectiunar sco pianist e cumponist.

2009 fa Mario Pacchioli l'enconuschientscha digl actur e reschissur grischun Bruno Cathomas. Ell'inscenaziun dil toc "In siemi dalla notg sogn Gion" da Shakespeare scuviera Mario Pacchioli sco "Puck" sia pissiun per il teater e serenda sinaquei a Paris, nua ch'el absolve igl onn 2012 sia scolaziun d'actur alla "Académie Internationale Des Arts du Spectacle".

2013 scriva el – ensemen cun il cantadur svizzer Laurent Brunetti – il recital da chanson «Pêcheurs de Rêves». Cun quell'ovra musicala sepresentan ils dus artists dalurenneu per igl entir mund entuorn, e quei sin damonda d'ambassadas svizras e franzosas.

Sco artist independent lavura Mario Pacchioli sco musicist, cantadur ed actur. Sia gronda pissiun ei da cumponer ed arranschar musica per texts en differents lungatgs e da differents tempras, texts che tuccan el en siu profund.

Mario Pacchioli viva denter la Frontscha e la Svizra, el ha ragischs talianas e siu cor batta per sia patria romontscha. Ed igl ei era quella varietad culturala che dat la tempru all'ovra sinfonica REMAS.

Discografia

- 2017 Mario Pacchioli – REMAS
- 2015 Pêcheurs de Rêves – le Récital
- 2009 Rispondas
- 2005 Vias
- 2004 Mario Pacchioli
- 2000 Alla musica
- 1998 Pertgei
- 1995 Cant (canzuns popularas romontschas e talianas)